


8474



A. Dupl

RESPON-

SIO AD ORATIONEM HABITAM
TAM NUPER IN CONCILIO HELVE-
tiorum, pro defensione cædium & latro-
ciniorum, quæ in Gallia commis-
sa sunt: editam & promul-
gatam Germanicè.

AVCTORE VVOLFGANGO
Prisbachio Cracouiensi.



RVPELLAE, 1573.

Care

F

39

.326

1573pr

THE NEWBERRY
LIBRARY

RESPONSIO AD ORATIONEM
 habitam nuper in concilio Heluetiorum
 pro defensione cædium & latrociniorum,
 quæ in Gallia commissa sunt: editam
 & promulgatam Ger-
 manicæ,



VPERIore proximo mense
 Augusto, circiter triginta ho-
 minum millia in Regno Gal-
 liæ paucorum dierum spa-
 cio trucidata sunt: non in
 prælio, sed in summa quiete

& otio: non armati & pugnantes: sed par-
 tim nudi atq; in lectulis dormientes: par-
 tim supplices ac misericordiam trucidanti-
 um implorantes: non vnum in locum co-
 acti, sed suis quicq; in ciuitatibus ac domi-
 cilijs constituti: non per iudicium & legi-
 timam quæstionem, sed rabie quadam at-
 que impetu bacchantis furentisque popu-
 li: in eoque numero quamplurimi fuerunt
 morbo affecti, multi natu grandes, multæ
 nobiles matronæ, generosæ virgines, mu-
 lieres prægnantes, pueri, infantésq; com-
 plures: viri præterea quamplurimi doctri-
 narum atque artium omnium eruditione
 præstantes, & ab omni armorum ac tumul-

A ij tus

tus suspitione remotissimi. Ex illa carnificina multa item hominum millia facinore illo, quasi tempestate ac fulmine territa, relictis metu coniugibus ac liberis, in Angliam, Germaniam & Heluetiam tanquam in asylum confugerunt. Hæc vera esse Magnificentissimi & Potentissimi Helvetiorum magistratus, quique in eorum fide atque imperio sunt, norunt. Si diuinis atque humanis legibus semper omnibus seculis nefas habitum est, vnius hominis sanguinem iniuste profundere, necesse est aut magnam aliquam & atrocem illarum totædium causam fuisse, aut eos qui auctores earum fuerunt, nefarios ac sceleratos haberi. quippe quum etiam veteres prophani homines, & veræ Religionis imperiti, negarent fas esse, Solem intueri eum, qui hominem vnicum à se occisum fatetur. Est enim diuina illa lex, natura in hominum mentibus insita: Qui hominis sanguinem profuderit, eius sanguis profunditor. Nam homo ad imaginem Dei creatus est: neque violari quisquam innocens potest, vt non eodem scelere imago Dei violetur. Itaque præclarum apud Athenienses institutum fuit, vt etiam lapides, saxa, ferrum & res inanimæ, quarum casu & ruina interfectus homo fuisset, cum publicis

exc.

execrationibus extra imperij fines abijcerentur. Quæ quum ita sint, tamen exortus est nuper in Heluetiorum concilio, non Orator, sed conuiciator quidam, qui se Regis Galliarum Legatum professus, ausus est dicere horrendam illam trucidationem Regis mandatu atque imperio factam esse: & hanc tantarum irarum causam fuisse, quòd Amirallius Castilonius, cui potissimum nex oblata est, vna cum aliquot nobilibus consilium inierat de adolescente Guysio interficiendo: simulque mentionem aliquam aspersit de Regis matre Catharina Florentina, & eiusdem Regis fratre Henrico Duce Andico: quasi ad illos quoque consilium illud aliqua ex parte pertinuisset. Hæc illius non orationis, sed Conuitij petulantis ferè summa est, cui primùm summatim respondebimus: tum deinde ad singula ipsius criminationis capita descendemus, quanquam non tam illa criminatio est, quàm famosus libellus, probris, obtreptione, contumelijs, conuitijsque refertus, quò indignior istius Conuiciatoris petulantia est: qui cui viuo & florenti nuper assentabatur, eidem nunc mortuo impudentissimè maledicit. Primum omnium, vt Amirallius cum aliquot familiaribus suis coniurationem illam fecerit, nō tamen iusta

fuit causa triginta insuper hominum milia iugulandi. Neque enim innocentes nocentium supplicio afficiendi sunt, neque alter ob alterius crimen damnandus. Quin etiam laudata semper vulgata illa sententia est: Satius esse nocentem absolui, quàm innocentem damnari. Quare, vt verum esse concedamus, Amirallium aliquam istiusmodi coniurationem fecisse, tamen quum iste Conuiciator tam multa hominum milia Regis imperio trucidata esse dicit, horribilis eum & post hominum genus natum atrocissimi facinoris insinuat. Atqui plerumque in praelijs vsuuenit, vt victis vniuersis, tamen singulis parcatur, & profligato exercitu, Duces victoria contenti dedititios in fidem recipiant: ac supplicio de paucis quibusdam nocentibus sumto, reliquis omnibus eiusdem tamen criminis socijs parcant. Quàm dissimilem Regis rationem nobis Conuiciator iste commemorat, vt propter paucorum nocentium culpam, toti innocentium sanguinem profuderit: de quo Deum, & Solem cœlumque & naturam rerum, & non modò mortales qui nunc viuunt, verum etiam posteros testamur, Regnante Carolo IX. Valesio, triginta hominum millia propter paucorum (vt isti dicunt) conspirationem in ipsius Regno trucidatos fuisse. Cetera

tera deinceps videamus. Conuiciator profi-
 tetur se Regis mādatu hanc apud Heluetios
 orationē habuisse. At sexcētæ Regis extant
 epistolæ, in omnes Regni sui Prouincias cir-
 cūmissæ, & Regis ipsius manu subscriptæ, si-
 gillóq; obsignatæ: quibus palàm atq; aper-
 tē denūtiat, cēdē cognatī sui Amirallī, aliāq;
 q; trucidationes Lutetię, aliisq; locis factas
 haudquaquā suo imperio, sed magno cum
 animi sui dolore cōmissas esse. quid ampli-
 us? Rex idem Potentissimus & Maximus
 denuntiat in iisdē literis ac profitetur Fran-
 ciscum Ducē Guysium adolescentem earū
 cædiū auctorem fuisse: qui se inscio, impru-
 dente, inuito, arma cum Parisiensibus ciui-
 bus ceperit, & impetum in Amirallī, cetero-
 rūmq; nobilium gēdes fecerit: dū ipse tumul-
 tu tanto ac tam inopinato perterritus in ar-
 cem se suā Luparam, vnā cum matre & fra-
 tribus suis abditū in occulto contineret: æ-
 grēq; suā illam arcem præsidij & custodij
 firmasset: magnóq; se ob illas cædes ac se-
 ditiones in vitæ discrimine versatum esse.
 Quinetiam extant Thesaurarij Regij (nomi-
 ne Grangiani) literæ ad Magnificentissi-
 mos Consules Senatūq; Bernensem, Fon-
 tanij ordinarij Legati, & ipsius Grangiani
 nomine scriptæ, quibus illud idem totidem
 propē, verbis nuntiatur, affirmatūq; Regiā

Maieſtatem indigniſſimè eadẽ illam Amiralli cognati ſui tuliffe: neq; illam propter cauſam Religionis, ſed propter priuatas Caſtilonicæ & Guyſianæ domus inimicitias accidiſſe. Itaq; non eſſe dubitandum, quin Rex ſit propediem facinus illud acerrimè vindicaturus. Hæc Magnificentiſſimi populi Bernenſis Magiſtratus vera eſſe ſciunt. Nunc vtris potiùs nos credere conuenit, Fontanio & Grangiano affirmantibus, an iſti Conuiciatori neganti: vtrum potiùs ipſi Regi, eiùſq; literis per totam Galliam circummiſſis, an verò huic ipſius (vt ſeſe nominat) emiſſario: Nobis certè verendum videtur, ne, dum Emiſſarius iſte purgare alios ac defendere conatur, ſe ipſum in grauiffimum euentuæ legationis crimen inducat. Semper huius Regis Caroli IX. clemens & manſuetum ingenium prædicari audieramus. Semper poſt ſedatos in Regno ſuo tumultus maxima ipſius in Amirallium beneuolentiæ testimonia extiterunt, ſæpe ex ipſo auditum eſt, quum diceret, velle ſe Regis Veridici cognomētum obtinere. Quàm verò huic honeſtiſſimo Veridici vocabulo conſentaneum videtur, quod iſti neſcio qui prædicant, Regem tantarum crudelitatum & trucidationum auctorem comprobato remq; fuiſſe, neque vnquam de ijs pœnas ſum

sumturū: Nam quæ (vt ait Sallustius) apud
 alios iracundia dicitur, ea in imperio super-
 bia atq; crudelitas appellatur. Ac sex qui-
 dem his totis mensibus ne vnicam quidem
 vllō in oppido quæstionem earum cedium
 nomine decretam fuisse, satis inter omnes
 constat. Sed reliqua videamus. Emissarius
 noster profitetur, se diplomata & literas Re-
 gias habere, quibus mandata & legatio-
 nem suam testetur. Profertur etiam libellus
 Lutetiæ & alijs locis impressus, in quo tra-
 ditur Regem XXVI. Augusti die in Parla-
 mento Parisiensi multis Principib. ac proce-
 ribus comitatum, professum esse, Amiralli-
 um mandatu atq; imperio suo interemtum
 fuisse, quod comperisset Amirallium inijisse
 consilium, vt se, duos ipsius fratres, & Regi-
 nam matrem & Regem Nauarrum interfici-
 ceret. Hoc loco Magnificentissimi Heluetio-
 rum Magistratus aliam multò grauiorem
 (& si dictu fas est) fœdiorem pugnantiam
 & contradictionem animaduertunt. Nam
 prius Conuiciatorem istum Regis literis &
 orationi aduersari videbamus. Nunc Regis
 ipsius pugnantes, aduersas & contradictori-
 as orationes perspicimus. quasi Regia Ma-
 iestas ex eodem ore (vt Rupellani loquun-
 tur) calidum & frigidum efflaret: Vnam e-
 andemq; rem albam et nigram esse affirma-

ret, quasi denique lucem tenebras, vicissim
 q̃ tenebras lucem esse diceret. At ijdem Ru-
 pellani disputant vetus esse iudicium in dis-
 ceptandis cōtrouersijs institutum, vt quum
 litigator pugnantia causæ suæ instrumenta
 profert, ea omnia pro nihilo habeantur. Et
 profecto ita est, vt vel istæ contradictiones
 solæ malè tum de istarum crudelitatum au-
 ctoribus, tum de isto siue Oratore, siue ex-
 ploratore nostro suspicādi occasionem præ-
 beant. Verum enim vetus verbum est: Sim-
 plicem veritatis orationem esse. Extant pas-
 sim libelli & literæ, quibus Rex cædium se il-
 larum auctorem fuisse negat easque apertè
 detestatur. Ecce iam contrarios libellos qui-
 bus earum se auctorem profitetur. Quid de
 ista contradictione iudicabimus? Quine-
 tiam aliam rursus varietatem ac pugnantia-
 am videmus. Rex scribit Amirallium con-
 silium inijisse, de se, & matre & suis fratri-
 bus interficiendis. At vaniloquus noster
 in Oratione sua nusquam de Rege mentio-
 nem facit: sed tantum de Duce Guysio, &
 nonnihil de Regina matre & duce Andri-
 co. Rursus Rex scribit, conspiracyem ab
 Amirallio factam de necando Rege Nauar-
 ro. Speculator quum pudore deterreretur
 apud grauissimos & amplissimos viros i-
 stud proferre, ne minimam quidem Regis
 Nauaræ

Nauarri mentionem interposuit. Alia rursus contradictio & pugna perspicitur. Rex in illis libellis scribit, conspiratum ab Amirallio post vulnera illi imposita. Emisarius contra ostendit eo consilio Amirallium Lutetiam profectum esse, ut scelera tam illam conpirationem, quam iam pridem animo conceperat, ad exitum perduceret: ob eamque causam multos secum sicarios & latrones in armis exercitatos adduxisse. Quinetiam explorator ipse in Oratione sua pugnancia loquitur. Primum scribit Amirallianos ea mente atque animo Lutetiam profectos esse, ut Guysium necarent. Alio vero loco scribit ipsos minaciter à Rege postulasse, ut Guysiani omnes ex aula excederent. Item Amirallium male semper in Regem animatum fuisse: paucis autem post versibus, Amirallium mirifice Regis erga se beneuolentiam suis artibus illexisse. In his foedissimis atque indignissimis contradictionibus (quas Magnificentissimi Heluetiorum magistratus luce clariores vident) quidnam certi constituere possumus? Nimirum, ut ne verba (que loquaculi cuiusvis arbitrio fingi possunt) sed res & facta & opera ipsa spectemus. Nam saepe res ipsae tacentibus hominibus loquuntur. Id quod nunc accidit, Orator enim

enim iste contendit, Regij quoque libelli
quidam clamitant, Amirallium ob nouam
quandam conſpirationem interentum fu-
iſſe. Nos contrà, Religionem quam Gal-
li reformatam appellant, quàmque pleri-
que Germani, Heluetij, Angli, Dani, Sue-
ui & Scoti publicè colunt, appetitam: ve-
tus hoc Religionis aduerſariorum conſili-
um fuiſſe, à Guyſianis ad eandem toto ter-
rarum orbe delendam inſtitutum: initiumq;
à Gallicis Eccleſijs factum fuiſſe. Vtrinop-
ſtrum verum dicant, non ex verbis, ſed ex
rerum ipſarum testimonijs, ex ſtatu, in-
quam, Regni Gallici, quiuis exiſtimare po-
terit. Primum ſimulatque cædes illæ Lu-
tetix & alijs locis editæ ſunt, omnibus in
oppidis, pagis, vicis & caſtellis, cultus Re-
ligionis, cuius nobis antehac poteſtas facta
fuerat, interdictus eſt. Secundò vt primum
illud idem facinus admiſſum eſt, repen-
tè latrocinia, rapinæ, direptiones, in om-
nibus prouincijs atque oppidis factæ ſunt:
ſed in eorum tantum ædibus ac villis, qui
Religionem reformatam profitebantur. Ita-
que conſtat centum millia honeſtiſſima-
rum familiarum latrocinijs illis oppreſſa
fuiſſe: & iam viduas ac pueros orbos innu-
merabiles cuncta Gallia in ſumma vel men-
dicatæ vel inopia vagari. Tertiò, poſtquàm
illud

illud facinus admissum est, protinus quicumque in oppidis, vicis, pagis, castellis reperiuntur sunt illius nostræ Religionis cultores, omnes vel occisi crudeliter, vel ad illam Religionem abiurandam minis & terrore mortis adacti sunt. Præscriptaque est Regis imperio Abiurationis formula, qua receptam Religionem Evangelicam detestarentur: & Papam Romanum pro vicario Dei, & unico Ecclesiæ doctore, ac magistro agnoscerent. Dicit Orator iste, Regi esse in animo, gentem Heluetiam, ut sociam & amicam omnibus suis copiis atque opibus tueari: neque cuiquam extero principi propter Religionem negocium facessere, Homo vaniloquus, ut plerique (inquit Liuius) quos opes Regiæ alunt, maria, terras inani sonitu verborum complet. Dicat nunc idem Orator: Rex ille, qui se Dei gratia Nauarrorum Regem, ac proinde alium à Rege Galliæ Regem profitetur, comitibus ministrisque suis omnibus ante oculos suos interfectis, utrumne Religionis suæ libertati relictus, an verò ad Pontificiam statim adactus fuerit. Princeps Condæus, (qui tamen in Regis clientela est) fratresque ipsius paruuli Regio creati sanguine, nonne Religioni, in qua educati, baptizati etiam nonnulli fuerant, renūciare coacti sunt? Quid? Ducissa Ferrarig
matro

matrona Illustris. Regis Ludouici XII filia,
 natu grandis, quam Orator quodā loco ho-
 norificè, vt debuit, nominat. quid facere tot
 lacrymis effusis coacta est? quotusquisq;
 ex ipsius comitatu, familia & gynæceo re-
 stitit, qui nō abiurare suam Religionem co-
 actus sit? Denique interceptæ sunt Ducis
 Guysij literæ ad auiam ipsius paternam scri-
 ptæ, & Lutetia XXVII. Octobris proximi
 superioris datæ, quibus nuntiat, se illo ipso
 die in Consilio Regio interfuisse, in quo Rex
 decretum fecerat de omnibus qui Romanā
 Religionem non colerent, exterminandis,
 eorūque reliquijs funditus delendis, stir-
 pēq; radicitus euellenda. Nam hæc illius
 verba sunt. Deceuit, inquit, ne vni qui-
 dem parcere, ac non mulieribus, non in-
 fantibus abstinere. Itaque nunc ex tam ma-
 gno ciuitatum ac vicorum numero, in qui-
 bus antehac ex pacificatorio Regis edicto,
 Religio reformata colebatur, non amplius
 quatuor aut quinque oppidula supersunt,
 Rupella, Montalbanum, Sancerra & Ne-
 mansum, quō se patres fa. aliquot qui è car-
 nificum manibus effugere potuerunt reli-
 ctis coniugibus ac liberis, receperūt. Quan-
 quam quid diximus superesse? Nullum
 enim iam illorum oppidorum est, quod
 non hostili obsidione prematur, nonnulla
 etiam

etiam tormentis & machinis oppugnantur. Neque huius tantæ acerbitalis alia causa profertur, quàm quod palàm in Aula dictatur, Regi certum ac deliberatū esse, non modò Clientes omnes suos (qui se tamen non ut pecudes in lanienam, sed ut homines in fidem ipsius tradiderunt,) verùm etiam omnes alios qui in orbe Christiano sunt sub imperium potestatemq; Pontificis R. redigere. Hæc, inquam, passim non modò in Aula, verùm etiam tota Gallia dictitari, ne Speculator quidem ipse, ut opinamur, negare audebit; eodémq; tot Cardinalium & Legatorum Romanorum concursationes, & Cardinalis Lotharingi in Aulam aduentum pertinere: ex quo sæpe in itinere auditum est, nullum intra biennium tota Europa locum fore, in quo Pontificis Romani maiestas dignitatem suam non recuperet: Vnàmque sibi hanc adipiscendi Pontificatus summi facultatem superesse. Ita, que vix pedem in Aula posuit, quum subito exercitus euocati, & ad illas obsidiones dimissi sunt. Hæc igitur facta clara & perspicua optamus à Magnificentissimis Helvetiorum magistratibus, atque Illustrissimis Principibus Germanis spectari, non inania & pugnancia quorundam vaniloquorum verba, qui pretio adducti vel Solèmeri

meridie lucere negarent, si quod impudentiæ suæ præmium eo nomine expectarent. Quid verbis opus est? Ter bellum in Gallia Religionis defendendæ causa gestum est. Ter hac pactione sedatum, ut certis locis Religio coleretur. At tertio bello renovato anno M. D. LXVIII. Edictum Regis cum hac horribili clausula promulgatum est, quamvis superioribus compositionibus Rex cultum Religionis permisisset, semper tamen eam rem ab animo suo alienissimam fuisse, semper in animo habuisse libertatem Religionis opprimere. Ecquodnam aliud certius, perfidiosæ pacis testimonium quærimus, consiliiq; de Religionis delenda initi. Itaque tam indigna Regia Maiestate clausula illa visa est, ut in alia eiusdem Edicti editione deleteretur. Quid? Audebitne Vaniloquus iste noster negare, quod Sole ipso clarius est, centum honestissimarum familiarum millia triduo in Gallia latrocinij & rapinis oppressa fuisse: & ad summam egestatem ac mendicitatem redacta: oppida illa, quæ nominavimus, obsidione & oppugnatione premis: non alia quàm Religionis causa? Audebitne etiam inficiari circummissos in singula oppida præcones ac tubicines, qui Regis nomine interdicerent, ne qua Religio præter Roma

Romanam & Pontificiam vlla in Gallia
 parte vsurparetur. Quæ quum ita se habe-
 ant, possunt & Illustrissimi Germaniæ Prin-
 cipes, & Magnificentissimi Heluetiorum
 magistratus constituere, quantum fidei Ora-
 toris istius verbis & pollicitationibus tri-
 buere debeant: qui studia & officia & be-
 neuolentias nescio quas ijs se deferre pro-
 fitetur, quasi verò, qui communem causam
 oppugnat, non omnes qui in eadem causa
 sunt, oppugnare cogitet, aut quasi non in
 eodem omnes qui eandem Religionem co-
 lunt, nauigio sint, & dum illud Emissarij
 ac veteratores isti perforant, non in idem
 nos omnes discrimen ac periculum addu-
 cant: aut quasi Germaniæ & Heluetij ne-
 sciant, Concilij Tridentini, & eius fœde-
 ris (quod Sacrum appellant) hos esse fru-
 ctus, decretæ inquam ab ijs (vt appellant)
 vindemiæ cruentæ has esse primitias. Sed
 iam tempus videtur ad singula Conuicia
 toris istius maledicta & obtrectiones ac-
 cedere, quarum summa ac vehementissi-
 ma illa fuit, in qua non aperte ac diluci-
 de, sed per ambages quasdam calumnia-
 tur, Amirallium cum aliquot suis gregali-
 bus consilium Regis Galliarum necandi ce-
 pisse. Quod crimen planè ac perspicuè li-
 bellus Regis nomine diuulgatus, & pro-
 B testa

testatio ab ipso in Parisiensi Parlamento facta eidem Amirallio imponit. Primum omnium satis constat, sublato hoc Rege Carolo IX. non potuisse Amirallium amicorem vllum sibi in Gallia Regem sperare. Nam Dux Andicus Henricus, frater natus minor, qui Regi interemto successurus fuerat, semper infestissimum sese Amirallio & Religioni reformatæ aduersarium præbuit, eamque, quibus potuit, modis vexauit: nunc etiam exercitu & copijs quas conscribere potuit instructus miserandum in modum insectatur. Quod si de tribus fratribus interficiendis initum ab Amirallio consilium dicatur, cui dubium est, quin eo facinore admissio protinus omnes prouinciæ ac ciuitates Gallia arma sumturæ fuerint, atque optatissimam sibi delatam facultatem existimaturæ in Religiosos omnes irruendi, eosque de medio tollendi: præsertim qui oppidis clausi atque inermes in eorum qui Romanam Religionem colebant, potestate ac ditione essent. Quod verò ad Nauarrum Regem attinet, quem libelli Regis nomine impressi & euulgati clamitant in eorum numero fuisse quos Amirallius necare statuerat, quid absurdius fingi aut dici potest? Erat Nauarrus partium illarum Princeps. Quamdiu no-

uissit,

uissimum bellum durauit, penes eum summa imperij fuit. Bellum denique ipsius auspicijs ductuque gestum est. Confecto bello Ecclesiarum & Religionis illius patrociniū suscepit. Eundem Amirallius per triennium in sua (vt ita dicamus) potestate propter consilij sui auctoritatem habuit. neque vllus in orbe terrarum Princeps erat, vnde Amirallius maius praesidium ac beneuolentiam expectare posset. Cui tandem probari poterit amicos, comites, nutritios, domesticos denique Regis Nauarri, qui tum in arce Lupara, ac proinde in potestate Regis erant cum Amirallius interfectus est, in necem Heri sui conspirasse, qui paulò ante lucem è suis cubilibus excitati, & partim in area, partim in arce vestibulo ab Regis custodibus & satellitibus in ipsius Regis Nauarri flentis, & Regis misericordiam implorantis, oculis cruciati sunt. Cui probari poterit Amirallium duobus grauissimis vulneribus affectum, ægrum, ætate affecta, utroq; brachio captum, quorū de altero abscindendo Medici & chirurgi deliberabant, minus quadraginta horarum spacio (non enim longius vitam produxit) tantam conspirationem conflare potuisse: praesertim quum de Medicorum & Chirurgorū sententia, sermone & colloquio

B ij loquio

loquio interdictum illi fuisset. Cui probari poterit, eundem in Parisiensium se potestatem commissurum fuisse, & urbem Lutetiam ad tantum facinus delecturum, in qua hostes ipsius Guyssiani, momento temporis armatorum millia non minus sexaginta cogere poterant, ut conceptum & inueteratum in Amirallium odium expromerent. Quis credat potuisse istud Amirallium exequi in arce Lupara quæ non modo Heluetiorum, Scottorum, & Vasconum cohortibus ordinariis munita erat, verum etiam legione extraordinaria, quæ Regina mater aliquot ab hinc annis præter Regum veterum consuetudinem semper in suo comitatu habere consuevit. Quis Conuiciatoris istius verbis adduci poterit, ut credat Amirallium, siquid eiusmodi consilij agitasset, sese & suarum ædium custodiam in Cossenij potestatem commissurum fuisse, eiusque cohortis, quam Regis frater Henricus illi præsidium aliquod postulanti attribuerat. Sed ut iam superius diximus, in re perspicua, nihil opus est argumentis. Constat inter omnes Lutetiae amplius quatuor hominum millia qui reformatam Religionem colebant, tridui spacio interfecta atque in profluentem abiecta fuisse. Lugduni simili crudelitate, præfecti Mandæloti non imperio, sed rabie, in

Rho,

Rhodanum & Ararim amplius tria millia
 deiecta. Rhotomagi item amplius duo mil-
 lia. Burdegala, Tholosa, Troye, Andibus,
 Alitissioduri, Biturigæ occisorum corpora
 crudelem in modum laniata, vincto tracta,
 & in flumen abiecta fuisse. Quid de Aure-
 lianis ciuibus dicemus, quorum antea in ci-
 uitate habitare humanitas videbatur. Su-
 perioribus nouissimis tumultibus circiter
 centum & viginti honestos viros in Insu-
 la, (quam vulgò Quadrangulam domum
 appellant) inclusos ignibus subiectis vi-
 uos cremarunt. Aliquantò post non pau-
 ciores in carcerem compactos immixtis si-
 carijs trucidarunt. Nuper verò accepto de
 Parisiensi carnificina nuncio, literisq; Con-
 cionatoris. Regij, nomine Sanctofidij, ad-
 moniti, impetum hostiatim in singulas Re-
 ligiosorum domos fecerunt: ac circiter mil-
 le ducentos viros trucidarunt: mulieres e-
 tiam octo & viginti: eorumq; omnium cor-
 pora primùm per fenestras in vicos abiecer-
 unt, tum inusitata rabie pervias vrbis lu-
 tentas tracta in Ligerim præcipitarunt.
 Vnum etiam qui in Decurionum atrium
 profugerat, in ipsorum conspectu necarunt.
 Nemo tum Aurelij fuit (fuerunt autem ado-
 lescentes Germani complures nobiles, stu-
 diorum causa à parentibus missi) quin sæ-

pe sicarios illos magna voce clamantes au-
dierit, Vbi est Deus vester? vbi vestrae pre-
ces, & Psalmi & inuocatio? Seruet vos
Deus vester si potest. Nemo etiam illorum
est qui nesciat urbem omnium propè to-
tius Galliae nobilissimam rapinis & latro-
cinijs laceratam, nunc amplius tribus pue-
rorum millibus refertam esse, qui honestis
orti familijs nunc in summam egestatem
atque inopiam redacti sunt. Ex quibus faci-
le intellectu est, quam verè ab istis vetera-
toribus dicatur, caedes illas & carnificinas
non propter Religionem, sed propter ne-
scio quam nouam conspirationem factas
esse. Age, cætera videamus. Alterum con-
tumeliosi libelli conuicium est, quod Ami-
rallius magnas passim cuncta Gallia pecu-
nias, magnam auri atque argenti vim conge-
rebat, ut se Regi potentia & opibus adæqua-
ret: & quum sibi commodum videretur,
exercitus aduersus Regem compararet quo
loco Conuiciator exclamans vociferatur
Amirallium peculatus & læsæ Maiestatis
reum fuisse. Primum ut Amirallium non mo-
dò peculatorem & perduellionem, verum
etiam veneficum, atque adeo (si ita placet)
parricidam fuisse concedamus: tamen que-
rere ex isto Criminatore apud æquos iudices
vellemus, quamobrem reus illis crimini-
bus

nisbus gentium omnium more & iure fa-
 ctus non sit: cur non comprehensus, in car-
 cerem compulsus, in iudicium adductus:
 Cur non causam è vinculis dicere coactus:
 cur indicta causa, inauditus, indemnatus
 omni supplicio excruciatu est: cur corpus
 ipsius per triduum (vt in historia à vobis e-
 dita scriptum est) vnco per vias vrbs Lute-
 tiæ tractum contumeliisq; omnibus affe-
 ctum est: Hæccine Gallicæ gentis Ascræa
 est, vt crimen sine accusatore imponatur:
 sententia sine consilio: damnatio sine de-
 fensione: supplicium sine causæ cognitio-
 ne: Quorsum igitur tot Parlamenta & ma-
 gistratus, & causidici ac rabulæ in Gallia:
 Cur plures in vnico Galliæ oppido rabu-
 læ numerari possunt, quàm in vniuersa Ger-
 mania, quæ duabus partibus Gallia ma-
 ior esse memoratur: Si peculator & per-
 duellis fuit Amirallius, cur non compre-
 hendebatur: An ita comitatus & instru-
 ctus Lutetiam venerat, vt comprehendî non
 posset: At in mediam urbem, intra ipsa mœ-
 nia compactus erat, vbi non modò Rex le-
 gionem suam extraordinariam, & Heluetio-
 rum, Scotorum ac Vasconum cohortes præ-
 torias habebat, verum etiam sexaginta Pa-
 risiensium millia vnus horulæ spacio coge-
 re, præsertim ad comprehendendum Ami-

gallium, poterat. Præterea grauissimis duobus vulneribus affectus lecto tenebatur. Conuiciator ipse quodam orationis suæ loco disertis verbis fatetur, incertam ac dubiam à Medicis ipsius salutem iudicatam fuisse. Iam verò custos ædium ipsius cum sua Sclopetariorum cohorte attributus ei fuerat Capitaneus Cossenius : Guylianæ familiæ cliens, alumnus, deuotus : & ouis (ut dicitur) custos lupus. Dicant omnes aulici sycophantæ & vaniloqui assentatores quod volunt : Veritas, veritas inquam, omnibus illorum calumnijs fortior ac valentior reperitur. Violatum est ius gentium, violata fides publica in Gallia, cum de tantæ dignitatis viro, ut propè tertius à Rege numeraretur, supplicium inaudita causa sumtum est sequitur atrocissimum criminacionis caput Magnas, (inquit Explorator noster) pecunias Amirallius ab ijs qui eandem cum ipso Religionem colebant, coegerat : per causam æris alieni Germanicis equitib. dissoluendi. At testes viuunt hodie in Gallia innumerabiles (quod ne Conuiciator quidem ipse inficiari audebit) primùm illas pecunias Regis imperio cogi solitas : deinde antequam id Rex decreuisset singulas summas in consilio Regis Nauarri, Principis Condæi, multis honestis viris assessoribus

ribus diligenter constitutas fuisse : easque in tabulis perscriptas : & illorum assessorum manibus obsignatas, ac tandem ad sanctius Regis consilium perlatas fuisse. Tum Regem vni ex ararij sui præfectis, nomine Vossilio (qui vulgò superintendens Gazæ Regiæ dicitur) negotium dedisse, vt rationes illas subduceret, deque ijs ad sanctius consilium referret. Ea re constituta, non fuisse in Amiralli aut cuiusquam alterius potestate, fraudem in ea re vllam admittere : aut teruntium plusquam constitutum fuerat, à Religiosis exigere. Præterea cæteri gazæ Regiæ præpositi, (qui vulgò Generales & Receptores dicuntur) quibus exigendæ illius pecuniæ data potestas erat, à Rege ipso delecti & nominati curatores fuerant : à quibus illorum tributorum ac mensuræ ratio exigenda est : non ab Amirallio, qui ei se negotio nunquam, nisi quum illos diligentia, fidei & officij sui admoneret, interposuit. Quinetiam tantum abest vt Amirallius suo compendio seruire poterit, vt constet etiam hodie duos prope libellarum milliones à Religiosis deberi. Iam verò quoniam Conuiciator iste dicit, se cautiones & apochas vidisse Amiralli manu subsignatas, quibus scribebat se libellarum sex millia recepisse pro tribus mensibus.

sibus exactis : & eo ampliùs viginti qua-
 tuor millia pro anno exacto : primùm in-
 telligendum est, Amirallium superioribus
 bellis omnibus, semper à pecunià publi-
 ca, quæ à Quæstoribus tractabatur, religio-
 sissimè ac prope supersticiosè abstinuisse.
 Amirallius, inquam, tribus bellis civilibus
 suis se opibus sustentavit : sua pecunià se
 domesticosque suos aluit : quacunque iter
 fecit, nemini siue hospiti, siue cauponi one-
 ri aut sumtui fuit : semper cibariorum & an-
 nonæ suo nomine pretium persolui iussit,
 quod denique ita rarò accidit, ut nunquam
 fere accidisse dicatur, fecit, ut stipendio
 suo militaret. At sub exitum tertij & po-
 stremit belli quum arca iam exhausta esset,
 neq; unde mutuam sumere pecuniam pos-
 set, haberet, coactus est ea de re ad Regis
 Nauarri & Principis Condæi consilium re-
 ferre, in quo procures & clari viri complu-
 res assidebant. In eo consilio non occultè,
 sed palàm attributa sunt illi stipendij nomi-
 ne bina libellarum millia mensura. Quar-
 rum rerum rationes diligenter à Quæstoribus
 confectæ & apochæ præterea manu Ami-
 rallij subscriptæ extant. Quòd si eius stipen-
 dij nomine vocari Amirallius in crimen po-
 test, necesse est, omnes æquè alios qui eo-
 dem modo stipendium accipiebant & Gal-

Ios & Germanos eodem crimine teneri.
 Cur enim pari in causa disparem iuris con-
 ditionem inducemus? Quid? quum apo-
 chæ Amiralli extent, eius stipendiij nomine
 Quæstoribus datæ, quibus acceptæ pecu-
 niæ causam illam nominatim exponit, quid
 est quod veterator iste calumniari possit?
 An fures aulici & peculatores auersarum
 pecuniarum apochas præbent? Quum i-
 gitur tot annos bella ciuilia durarint, tanta
 tamen Amiralli fuit abstinencia, religio,
 continentia, vt sex tantum septemue men-
 sium postremorum stipendium acceperit.
 At confecto bello Amirallius ne assem qui-
 dem eius stipendiij nomine vnquam attin-
 git. Quanquam pace constituta, quum pro-
 pter Guyssianorum insidias Rex Amirallio
 arcis & corporis sui custodes attribuisset,
 magnosque sumtus Amirallius & in illos
 facere cogeretur, & in ijs excipiendis qui
 ad eum assidue questum de Magistratuum
 iniurijs ex omnibus Galliæ partibus ven-
 titabant, in illo eodem publico Nauarri &
 Condæi consilio, non occultè, sed palàm
 ac publicè decretum fuit, vt ex ea pecunia
 quæ ex bellicis rationibus reliqua erat, mil-
 lenæ menstruæ libellæ ipsi attribuerentur.
 Quæ tamen perexigua pecunia est, si one-
 ra hospitum excipiendorum spectemus:
 quum

quum etiam Emissarijs istis persæpe maior ex plebis Gallicæ visceribus attribui pecunia soleat. Neq; verò prætereundum est, quod huc magnopere pertinet. Andeloto Amiralli fratre mortuo, pupillorum pecuniam Amirallius tutorio nomine administravit. Quum de compositione ageretur, eaque tractatio multos menses duraret, mitterenturque ex nostris castris in aulam maximis sumptibus nobiles complures eius tractationis nomine, Amirallius ex ea pupillorum pecunia multas summas erogavit. Has summas quæ publico nomine in sumptæ fuerant, Rex Nauarrus pace constituta in suo consilio, assessoribus consiliariisque suis abhibitis, restitui Amirallio imperavit, quas si Amirallius à Quæstoribus pecuniam publicam tractantibus de consilij sententia & decreto exegit, iure exegit, pupillorumque suorum nomine quibus ea debebatur, non sui lucri causa recuperavit. Earumque rerum & tractationum omnium rationes diligenter confectæ ac perscriptæ sunt. De pecunijs verò erogatis in sumptus quorūdam Capitaneorum & aliorum quos conviciator dicit in rationibus nominatos non esse: facilis & expedita responsio est, si modò fateri volet, id quod omnes sciunt, cuius auctoritate atq; auspicijs Belgicus

gicus apparatus ætate superiore institutus fuerit: si agnoscere velit, quod negare non potest, Regem eo nomine multis Centurionibus qui partes Amiralli superioribus bellis secuti fuerant, varias pecunias erogari iussisse: in his Roueræo, id quod omnibus notum est, qui Montij in obsidione interfectus est, quingentos scutatos aureos. Nam etiam paucis ante Amiralli cædem diebus Rex imperarat ei qui Parsimoniæ Thesaurarius dicitur, ut tria libellarum millia, ijs ipsis de causis Amirallio adnumeraret: quemadmodum ex rationibus eiusdem Thesaurarii constare poterit. Quamquam quid agimus? aut cui tandem tractatæ ab Amirallio pecuniæ rationem reddimus? An verò ridiculum non videtur, rationem eum administrationis ab altero reposcere, qui non possit suæ reddere? Tu verò, Conuiciator, qui tantas largitiones Regias in Heluetia per tot annos administraisti, toties in tuas rationes munera Centurionibus & præfectis militaribus, & speculatoribus tuis, arbitrato tuo data ac dispersita induxisti: si quis seuerius abs te rationes reposceret, quid faceres? At vide quantum inter te & Amirallium intersit nisi verò nefas est tantum virum cum isto veteratore conferre. Tu familia plebeia natus, aulicis artibus

bus paucorum annorum spacio in maximas opes excreuisti. At Amirallius patre Marescallo Franciæ, auis proauisque illustribus natus, Magni Connestablij sororis filius, tot annos in maximis Regni negotijs versatus, quasnam opes congeffit? quas villas, quæ latifundia comparauit? Quibus locis suum patrimonium amplificauit? Hic te manifestæ vanitatis & calumniæ teneri non sentis? Non Amirallij mediocritatem testem ipsius abstinentiæ & integritatis idoneam esse fateberis? Nos verò etiam testes tibi producemus creditores ipsius Amirallij complures, in his Aurelianos mercatores & patres sac. catholicarum (vt vos loquimini) partium studiosissimos, qui fatebuntur Amirallium, vsurarum nomine non minus octona libellarum millia annua pendere solitum fuisse, ac præterea amplius quinquaginta aureorum scutatorum millia certis hominibus debuisse. Verùm hæc quidem de peculatus calumnia plus satis. Sequitur quartum maledicti genus: quum Emisarius noster in Heluetiorum concilio dicere ausus est, Amirallium palàm in Regio senatu sanctiore minitatum esse Regi, nisi bellum Hispano & Albano inferret, fore vt bonam Gallorum partem aduersus Maestatem ipsius concitaret, Huic igitur nos qui

qui Amiralli actionum testes ac participes
fuimus, ita breuiter respondemus. Paucis
ante nouissimam pacem mensibus venti-
tabat in Regis Nauarri castra Birónius præ-
fectus fabrū, siue magnus Tormentorū
Reriorū magister, à Rege de compositio-
ne & pace concilianda missus. Is Amiral-
lio, Ludouico, Comiti Nassouio & Theli-
gnio Amiralli genero sæpenumero dixit,
mandatum se à Rege habere, vt cum ipso
de bello in Belgas transferendo ageret:
partim quòd magnis ab illo Rege contu-
melijs affectus esset, partim quòd Amiral-
lius Principem Vranium in suis castris ha-
buisset, tum etiam Ludouicum Comitem
Nassouium Vranij fratrem apud se habe-
ret: quorum opera facilis in Belgarum ci-
uitates aditus præberi posset. Ex eo tempo-
re quid Rex Vranio, Nassouio, & alijs de il-
lo apparatu scripserit, quæ mandata Gen-
lisio, Lanouio, cæterisque qui Montium oc-
cuparant, dederit, nihil nos attinet com-
memorare. Dux Albanus, Dux, inquam, ipse
Albanus (quod te Conuiciator ex cruciat)
plura iam interceptis Nassouij, Genlisij &
aliorum literis, & ex captiuorum quos sum-
mis cruciatibus affecit confessionibus per-
uestigauit, quàm ad illa regenda consilia
opus fuisset. Quas Genlisius equitum pe-
ditum

ditumque copias cuncta ex Gallia, ut eas in Belgas educeret, ex utriusque Religionis militibus comparavit, quas Villerius Pausius eo tempore quo Amirallius occisus est, iam undique conscripserat, & eodem dicebat, cui probabitur ita palam & aperte si ne Regis imperio comparatas fuisse. Præsertim quum bona militum equitumque pars eorum è numero esset, qui Catholici nominantur. Si tot apparatus Regis imperio ac mandatu factos neges, primum in re omnibus nota, ipsisque etiam hostibus comperta nihil nisi impudentiæ & perfritæ frontis laudem assequere, deinde coges nos enuntiare multa, quorum iam magnam ab Albano partem illustratam ac patefactam esse constat. Cuinam ergo probabis Amirallium ista minaci & furiosa oratione apud Regem usum fuisse: nisi qui vel ipsius gravitatem & moderationem ignorabit: vel de propenso Regis in illud bellum animo nihil audierit. Quintum maledictorum genus fuit, quod Amirallius circum se semper latrones in hominibus necandis exercitatos habuerit. Dictum est iam ante, non ex verbis, sed ex factis quam rem æstimandam esse. Bellum gessit Amirallius in Gallia una cum Principibus Condæis patre & filio, annos multos. Postremo una cum

cum Rege Nauarro, semper vna cum delectissimis Equitibus, & (vt rem verbo absol-
uam) vna cum flore nobilitatis Gallicæ. Si-
gna etiam cum aduersarijs sexies contulit,
& (vt Mars belli communis est) aliquoties
fusus est: interdum ipse aduersarios fudit,
cruentam certè semper & luctuosam suis ad-
uersarijs victoriam reliquit. Si proceres ac
nobiles illos, latrones Conuiciator appel-
lat, & in hominibus necandis exercitatos:
primum in generosissimas quasque totius
Gallicæ familias contumeliosus est: actur-
pe est, quibus viuus sit assentatus, in eos-
dem mortuos probra & maledicta conijce-
re: deinde ipsi Regi grauem facit iniuriam,
qui in omnibus suis Pactionibus, edictis
que pacificatorijs testatus est, omnes eos,
qui cum Amirallio arma tulerant, non con-
tra se, sed pro sua dignitate & seruitio (vt
ipse loquitur) tulisse: omnes se illos pro fi-
dis clientibus habere: scireque illos optimo
erga se animo, & tantummodo tuendæ Re-
gionis, non Regis sui oppugnandi causa,
bellum suscepisse. Iam verò quid de Illu-
strissimis Principibus Germanis dicemus:
Quinque Potentissimi Principes, Elector
Palatinatus, Landgrauius Hassiæ, Duces
VVirtebergicus & Bipontinus, & Marchio
Badensis primo ciuili bello subsidium equi-
C tum

tum Germanorum Amirallio miserunt. Secundo bello Illustrissimus Dux Casimirus, tertio Dux Bipontinus copias auxiliares Amirallio non miserunt, sed ipsi adduxerunt. Audebitne Speculator iste Germanos illos Principes latronum nomine appellare? Ipse amplissimus Bernensis Senatus primo ciuili bello aliquot Heluetiorum millia subsidio Condæo & Amirallio misit, an ut latrocinia in Gallia facerent? quemadmodum Conuiciator iste petulanter loquutus est. Imò verò ut Religionis causam & Regiam auctoritatem, quam Guysiani oppugnabant, defenderent. Denique primo ciuili bello missi sunt Legati duo à Principe Condæo Francofurtum, ad concilium Germaniæ: cui Ferdinandus Imperator præfuit, Maximilianus autem Imperator inuictissimus qui nunc regnat, interfuit, & auspicator Romanorum rex creatus est. In eo concilio prolata, recitataeque sunt literæ, manu Reginæ matris ad Principem Condæum scriptæ, quibus eum obnixè rogabat, ut sese ipsi opponeret, qui Regni pacem atque otium lannuario edicto constitutum conturbabant: ut matri & liberis, hoc est ipsi & Regi opem ferret: ut denique salutem Regni commendatam haberet. Neque verò prætermittendum est, quod Conuiciator in parte quadam

dam Orationis suæ pronuntiavit. Nā quum
 Amiralio mortuo petulantissimè maledi-
 ceret, quæsiuit ipse de se, quibus testimo-
 nijs omnia illa plana faceret, simulque re-
 spondit, anteaquam Amiralij vitam eo-
 rum omnium testem esse. Accipimus con-
 ditionem, ô Sycophanta vanissime, vicis-
 sim ex te querimus: Quid fuit causæ, cur
 Amiralius in tantum Romani Pontificis
 odium veniret? an non Religio? Quid à
 Regina matris gratia, aulicis & honoribus
 tantoperè illum remouit? annon Religio?
 Quis in medijs flammis (quibus nostrio-
 lim viui cremabantur) Regem, vt ab illa
 crudelitate abstineret, supplicare ausus est?
 annon Amiralius? quis ea de re ad sancti-
 us Regis consilium retulit? & tum retulit
 quum verbum ea de re nemo facere aude-
 ret? Annon ipse idem Amiralius? Quem
 habuerūt ministri & pastores Ecclesiarum,
 patronum, ad quem consilij auxiliique cau-
 sa confugerent? annon Amiralium? Quis
 nobilitatem Gallicam ab inueteratis aulae
 corruptelis primus ad pietatem & reforma-
 tionem vitæ reuocauit? annon idem ipse
 Amiralius? Cuius exempla Galli proce-
 res ac nobiles in condiscenda pietate, in fa-
 milijs suis reformandis, in Ecclesijs consti-
 tuendis, in precibus domesticis pronunti-
 andis,

andis, hymnis canendis, & lasciuis carminibus relinquendis imitabantur: Solius Amiralli. Nemo denique his quindecim annis Religionem in Gallia puriorem professus est, qui non Amiralli sanctimoniam, pietatem, modestiam, integritatem, iustitiam admiraretur: nemo qui eum propter illas virtutes non coleret. Vtri ergo fides potius habebitur, vaniloquo Conuiciatori, qui nuper viuum Amirallium in aula blandissime affectabatur, an centum hominum bonorum millibus, qui mortui memoriam eadem pietate colunt, qua antehac viui effigiem colebant. Habes igitur Speculator impudens ad tuum de latrocinij maledictum responsionem certissimam. Latrones dicuntur: qui homines prædæ causa spoliant: qui homines incautos per insidias interficiunt: id quod Lutetiæ factum est: qui denique proditorio ingenio ijs blandiuntur, quibus occultè pestem atq; interitum moluntur. Itaq; latrocinij finis est, rapina & direptio: At omnes Amiralli conatus, ærumnæ, consilia, labores vnicum hunc exitum & finem habuerunt, vt saluus in Gallia Religionis cultus esset. Non igitur ex tuis verbis, sed ex factis Amiralli de ipso & hæc ætas, & posteritas iudicabit. De te verò, Legate Speculator, qualem tandem

opinio

opinionem relicturus es? An Senatoris & Consiliarij Regij? Quum omnibus rebus Senator & Calumniator differunt, tum verò hac re vel maxime, quod ille siquem perniciosum Reipub. ciuem, siquem male erga Regem Regnumue animatum animaduertit, fortiter eum apud suum Regem accusat: & quò magis eum gratia atq; opibus florere videt, eò magis Regem vt ab illo caueat, hortatur. Hic verò quum illum in gratia esse videt, blanditur, obseruat, affectatur: ad eius se voluntatem inflectit: vbi verò se fortuna inclinauit, tum illum in crimen vocat, probris maledictisq; omnibus infectatur: si forte etiam interfectus est, execratur, memoriámq; illius, quibus potest contumelijs exagitat. Sextum maledictorum genus sequitur, quum vaniloquus noster scribit, Amirallium certos homines in quibusq; Gallæ prouincijs habuisse, quorum opera celeriter (quum ei commodum esset) exercitus comparare, & Regi bellum inferre posset: ob eamq; causam Regi & vniuerso Regno terrori ac formidini fuisse, Itaq; in ipsius pugillaribus reperta esse multorum Capitaneorum nomina, ipsius Amiralli manu scripta. Qua oratione ita Criminator noster vtitur, quasi apud Barbaros aliquos & Gallicarum rerum imperitos verba face-

ret: non apud sapientissimos viros, qui & Gallici Regni & nostrarum Ecclesiarum statum, æque vt nosmet ipsi, cognitum ac perspectum habent. Nemo nescit fuisse in omnibus Galliae prouincijs multos proceres, multos illustres, potentes, ac nobiles, qui eandem cum Amiralico Religionem reformatam colebant. Fuit etiam Ioanna Nauarorum Regina, fuit filius ipsius Rex Henricus. Fuere Principes Condæi, regio creati sanguine. Fuit in Campania Princeps Portianus: fuit frater ipsius Marquio Rinellius. Fuit in Santonibus Comes Rupifocaldius, fuit Duracius: in Andibus, Comes Sufianus, Lattomius: In Picardia, Genlesij, Moruillerius, Mouius, fratres Picquenij. Fuere in Prouincia Narbonensi & Lugdunensi Cyperrius, Dacerius, Beldinarius, Mombrunius, Pereus, Sancomantius, Harpagenius: fuit etiam Mouantius, virtute tamen, quam opibus nobilior. Hi quoties consilium de Religione opprimenda captum à Guysianis intellexerant, eodem animo ad arma concurrebant, vt si quos externos hostes patriæ bellum inferre intellexissent. Sic enim sibi persuaferant: Quot iure pro patria licet arma capere, eodem atque etiam multo maiore pro Religione priuato quorundam consilio oppugnata capere

capere licere. Neque verò tam Amirallius
 ipsorum opera, quàm ipsi Amiralij virtute,
 consilio atq; auctoritate utebantur. Hos
 si quis siue Legatus siue explorator, Regni
 hostes appellat, primùm eadem ipsa, qua
 paulò ante vsi sumus, defensione utemur,
 Regisq; tria Edicta opponemus, quibus testatur
 se Amiralij, cæterorumque omnium
 qui cum ipso pugnarunt, arma comprobare,
 scireq; suæ dignitatis, non ullius iniuriæ
 inferendæ causa bellum fecisse: eodémque
 illos loco ac numero habere, quo cæteros
 qui suo nomine ad bellum illis inferendum
 vsi fuerant: deinde alterum Regis eiusdem
 testimonium tibi opponemus, qui quum
 Hispaniensis Legatus Regis sui nomine vehementius
 quodam die expostularet, quòd
 pacem cum subiectis suis faceret, clamitaretque
 indignum esse Maiestate Regia cum
 subiectis pacisci: respondit, se cum subiectis
 suis neque pacem, neque pacem villam facere:
 neque enim illos bellum cum ipso gessisse,
 sed ipsos inter se, Catholicos scilicet & Religiosos,
 decertasse. Eorum autem contentiones velle
 se pacificatorio suo Edicto sedare. Postremo testem
 armorum exitum proferemus: quæ non ante
 capta sunt, quàm permissa Regis edicto Religionis
 libertas opprimeretur: simul ut, ea

C. iij. dem.

dem restituta est, protinus posita & abiecta sunt. Non igitur dispositos Amirallius bellicosos homines in Gallia prouincijs habuit, quorum opibus Regem oppugnaret : sed quum multi Amirallio potentiores illustrioresq; essent, qui Religionem opprimi nolebant, si consilium illius opprimendæ captum intellexerant, communi consilio vim vi depellebant. At Regem oppugnare est Maiestatem aut Imperium eius minuere : sibiq; partem eius aliquam assumere : à quo consilio alienissimum semper Amirallium fuisse, declarat illud, quod quandiu Ecclesijs Gallicis salua Religionis libertas mansit, nunquam arma sumsit : vbi eadem ademta, & restituta est, continuo ab armis discessit. Itaque ridiculum ac plane nugatorium est, quod Conuiciator subiunxit, nonnulla Centurionum nomina in occisi Amiralli pugillaribus reperta fuisse. Quid? vos igitur ista Parisiensi victoria non contenti, pugillares etiam & literas & arcas omnes exploratis? Quam dissimilis illa Cæsaris ratio fuisse memoratur : qui post Pharsalicam victoriam, quam non ab nudis, & sopitis, & supplicibus : sed ab armatis & fortiter pugnantibus reportarat : arculas, tabulas, literasq; omnes confici in ignem iussit. Verū esto, Reperta sunt in Amiralli

ralliꝝ codicillis aliquot centurionum nomina. Quasi verò Doctor, aut ludimagister aliquis esset Amirallius; cuius ars à militarium præfectorum consuetudine ac rationibus aliena esset. Nomina centurionum omnia quæ in Amiralliꝝ pugillaribus reperta sunt, quæ ab illo quotidie pronunciari audiebamus, scimus eorum fuisse, quos ad Belgicum apparatus Regis imperio mittebat, quib. Rex ipse dare mandata solebat: quos denique Rex nonnullis nostrum internuntijs ab Amirallio conqueri euocariq; iusserat: nisi fortè cuiquam te probaturum existimas, tantum in Gallia belli apparatus inscio, atque imprudente Rege fieri potuisse. Tot Gensilium & Vilerium cuncta ex Gallia cohortes sine ipsius venia, ducere in Picardiæ fines potuisse. Septimum, opinor, maledictum illud fuit, quod quum Amirallius, vulneribus affectus, rogatus esset à Rege, vt in arcem Luparam deportari se pateretur, contumaciter & arroganter id recusarit: quoniam (inquit Orator noster contumeliosus) malebat in suorum assecclærum Comitatu esse, quàm in Regis domicilio. Itaque semel ait illum ex lectulo surrexisse, & lacertos suos commouisse, tentasseq; , ecquid ad facinus aliquod idonei esse possent. O stultitiam Oratore Regio

C v indige

indignam: Apertè ipse quodam loco fate-
 tur, Amirallium ita grauitè ex illis vulne-
 ribus ægrotasse, vt Medici de ipsius salute
 dubitarent. Post illa vulnera accepta, vix
 Amirallius horas quadraginta vixit. Præ-
 stò ei assidue fuerunt nouem Medici: vn-
 decim chirurgi: plerique Regij. In his Do-
 ctor Marsilius, clarus ac nobilis in primis.
 Nemo tum illorum fuit, quin ei quietem
 & cessationem ab omni negotio, atque a-
 deò silentium imperaret, nemo qui non lo-
 co illum moueri prohiberet, ne fortè ex
 succussu dolor ingrauesceret: quum præfer-
 tim de sinistro brachio ei amputando ma-
 gnopere inter ipsos disceptaretur. Ecquæ-
 nam in homine exangui & semianimi tan-
 ta esse contumacia potuit, vt amantissimum
 Regis consilium repudiaret? Quid? si dela-
 tus in arcem Luparam Amirallius fuisset,
 meliusne actum cum illo fuisset? Si perpe-
 tuus Regis Regniq; hostis fuit Amirallius,
 qualem eum Conuiciator iste describit, si
 semper in gentem Valesiam malè anima-
 tus, si peculator, si latronum & sicariorum
 princeps, cur eum Rex tam amanter comi-
 tæq; inuitabat? An si in Regia domo mor-
 tuus Amirallius fuisset, bonus vir ac ciuis
 habitus fuisset? quoniam in priuata domo
 mortuus est, perduellis & peculator nomi-
 nabitur.

nabitur. Ista ergo ratione, locus innocentiam crimenue tribuit. Iudicet istam impudentem maledicendi petulantiam Deus, fycophantarum vindex iustus: mercedem, que ipsis debitam, persoluat. Hoc loco pauca de Maureuetio dicenda sunt: in quem Criminator noster vulneris Amirallio impositi suspicionem confert: nam planè & apertè nihil exprimit. Scribit tamen eum, si id fecit, non præmij spe & pollicitationibus adductum fecisse, sed quoniam Amirallius minitatus fuerat, se Mouij necem ulturum, quem Maureuetius interfecerat. Ante hac vulgo persuasum erat, Bondotum quendam Regium hyppotoxotam eius facinoris fuisse auctorem, propterea quòd compertum est, fistulam ferream, qua vulneratus est Amirallius, illius fuisse. Verùm esto. Fuerit auctor Maureuetius, is inquam, Maureuetius, qui tertio ciuili bello Mouium interfecit. At quo pacto interfecit? nam id Criminator noster astutè reticuit. Erat Mouius, vir potens, nobilis, & rei militaris laude inprimis clarus: cetero qui adeò mitis ac mansueto ingenio, vt etiam aduersarijs eo nomine charus atque acceptus esset. Is quum in Principis Condæi castris equitum turmæ præfectus esset, Maureuetius ad ipsum bello ciuili secundo venit.

Rogat

Rogat vt se in suum numerum recipiat. Rogatus sacramento iurat se & Condæo, & Mouio, præposito suo, fortem fidelémque operam in bello ac prælio præstiturum. Tertio ciuili bello Guyssianorum se partibus adiungit: eorúmque castra multis mensibus sectatur. Quum ad prodicionem administrandam ac facinus aliquod nefarium idoneus iudicatus esset, pactio fit cum eo, vt si pro transfuga in Nauarri castra profectus Amirallium ex insidijs interficeret, decem aureorum millia mercedis haberet. Cõditionem accipit. Septem ante prælium Monconturicum diebus in castra Nauarri proficiscitur, ad Mouium se, veterem suum præpositum confert, Guyssianos diris omnibus deuouet: execratur: quibus potest verborum contumelijs exagitat. Mouius asseueranti credit: Amirallio eum, cæterisque amicis commendat. Leuia tum quotidie prælia equestria propter castrorum propinquitatem mittebantur. His Maureuetius aderat: rei que gerendæ opportunitatem captabat. Sed quum Amirallius magno semper comitatu stipatus esset, nihil Maureuetius potuit. Triduo interposito prælium committitur. Initium fugæ nascitur à Maureuetio. Ea fuga multi terrentur, tum calamitas ingens accipitur. Biduo post Mouius

uius oppido Niortio præficitur. Quum equites hostium non procul visos esse, nunciatum illi fuisset: signum dari atque oppido nonnullos secum equites exire iubet. Præstò est Maureuetius. Vix quingentos extra oppidum passus Mouius prouectus est, quum ecce Maureuetius illum à tergo adortus, bombardulam in ipsius occiput intendit, eumque glande plumbea transfigit: simulque incitato equo, contento cursu ad hostes glorians ac spei plenus transfugit. Vbi ad eum, ad quem se tanquam ad laudem & præmium venturum sperabat, adductus est, miram aduentus sui expectationem commouit. Actum enim de Amiralio putabatur. Vbi nihil nisi de Mouio interfecto nunciauit, omnium propè vocibus repudiatus est. Mouij enim mansuetum (ut dixi) ingenium plerique omnes adamabant. Itaque sedato bello, consilij rationem immutauit. Nam bolum illum decem aureorum millium, quem spe iam atque animo deuorarat, sibi è faucibus ereptum, molestè ferebat. Pactionem de præmio renouat. Demonstrantur illi ædes Canonici Parisiensis, è quarum fenestris cancellatis res geri possit. Ne diutius teneam, eo modo, quem aduersarius exposuit, negocium confectum est. Verum ut ad Mouium reuertamur: quid nunc

nunc Criminator noster apud æquos iudices interrogatus respondebit : numquid nam hic à nobis affingi dicet : an periurum illud & prodicionem nefariam fuisse negabit : Vos verò crudeles sycophantæ, qui Poltrotium ob Grysiū interfectum, quædrigis tractum laniastis, ecquam isti proditori Maureuetio præposito suo perfidiosè interfecto pœnam statuistis : Si Poltrotium ob perfidiam (vt dicitis) tanto cruciatu affecistis, cur in pari scelere alteri præmium, alteri supplicium constituistis : cur quod in illo ius valuit, in pari eadēq; causa non valebit : Iam enim antea dictum est, Regem ipsum crebrò in ore habuisse, non contra se Mouium & Mouij similes arma tulisse : sed diuisos contentionibus suis clientes suos ipsos inter se decertasse. Quod quum ita sit, si proditor fuit Poltrotius, fuit etiam Maureuetius : si supplicio dignus Poltrotius, etiam dignus Maureuetius. At is magnus iam apud vos in honore est : magnisq; præmijs affectus : Romam etiam (vt vulgo dicunt) nuncij perferendi causa profectus, magnis à Pontifice donis muneratus est. Venio ad octauam istorum conuictorum partem : vbi scribitur Amirallium nunciam Regnò Galliarum memorabilem operam præstitisse : nūquam ipsum patriæ suæ,

nisi ad seditiones & ciuiles dissensiones
exercendas vsui fuisse. Quæ, malum, ista
impudentia est. Vtrum Senator iste lega-
tusque Regius in Repub. nostra hospes ver-
satur, maximarumq; rerum, quæ memoria
nostra gestæ sunt, est imperitus, an verò im-
probus & malitiosus: qui fortissimo Duci
& de patria sua optimè merito debitam lau-
dem inuidiosè detrahit. Año M. D. XLIII,
quum ad Regem allatus ex Insubria nun-
tius fuisset, rem ad prælium paucis diebus
deductum iri, confestim Amirallius annum
agens ætatis sextum & vicesimum iumen-
tis dispositis eò aduolauit: itaque se in eo
prælio (quod nostri Cerizolinum appel-
lant) gessit, vt spem bene gerendæ Reip:
quam omnes de ipsius indole ac virtute
conceperant, non modò sustinuerit, ver-
ùm etiã superarit. Aliquantò post pe-
destrium copiarum Gallicarum magister
ab Henrico Rege factus, disciplinam mili-
tarem superiorum magistratuum vitijs cor-
ruptam seuerissimis legibus restituit: quæ le-
ges aliquantò post iussu Regis editæ, atque
vsque ad hoc tempus obseruatæ sunt. quæ
de causa Eques ordinis Regij factus est:
statimq; pro regio imperio in Nortmanniã
& Boloniam missus. Anno M. D. XLVIII,
orto inter Gallos & Anglos bello, quum
Galli

Galli Boloniam oppidum obsiderent, castellum propè ab ipsius mœnibus incredibili diligentia ædificauit, vnde tantam oppugnandi oppidi facultatem præbuit, vt non magno tempore interiecto deditio nem oppidani facere cogerentur. Qua de causa, castellum illud ex Amiralli nomine Castilonicum dictum est, hodièq; nomen illud retinet. Itaque ob eam causam Rex eum Amirallium creauit, qua dignitate nullo iam ferè in Regno Galliarum maiorem, aut illustriorem esse constat. Paulò post Picardiarum & Insularum Franciarum Gubernator factus est. Iam verò, cui memorabile illud eiusdem facinus ad oppidum Sanquintinum non sæpe auditum est, quum per medios hostes qui tum illud obsidebant, iamque fossarum partem præsidij occuparant, tamen in oppidum ingressus est, secumque ducentos quadraginta milites introduxit, fortiterque hostium impetus multos sustinuit. Sed melius erit harum rerum narrationem & integram Amiralli vitæ historiam, quam in manibus habemus, aliud in tempus differre. Nunc eorum, quæ in cæde indignissima acciderunt, summam subiungemus. Vt primum ex ædibus Villemuri Sacerdotis & Canonici Parisiensis, qui Ducem Guyssium literarum elementa docuit, Amiral.

rallius duabus greis glādibus percussus est,
 in cubiculum suum à suis deductus est. Eo-
 dem confestim medici chirurgique ad vo-
 larunt: vni exijs qui hæc testantur, Amiral-
 lius duas chartulas dedit: quarum in alte-
 ra Epistola erat Comitis Nassouij: in alte-
 ra supplicatio quam Typographi cuius-
 dam nomine Regi oblaturus fuerat. Tum
 in lectulum impositus est, vnde quum Mau-
 rum Reginæ Nauarræ concionatorem ani-
 maduertisset, verba hæc pronuntiavit. Hem
 mi frater: nunc sentio me à Deo singulārī
 honore affectum esse, quod propter san-
 ctissimum ipsius nomen plagas istas acce-
 perim. Faxit ipse, ne vsitata suæ erga me
 clementiæ obliuiscar. Quum eodem chi-
 rurgus Regius, nomine Ambrosius venis-
 set, iussit vnum ex ijs qui hæc testantur,
 brachium sustinere: apertēque dixit, digi-
 tum illi amputandum, quod quum ille for-
 cipibus non satis acutis facere cœpisset,
 magnum misero dolorem attulit. Ter e-
 nim forcipes aperire, ter premere coactus
 est. Vbi ad brachium ventum est, interue-
 nit Merlinius Principis Condæi conciona-
 tor, qui vbi è literis sacris eum consolari at-
 que ad patientiam cohortari cœpisset, sæ-
 pe Amirallius in has voces erupit: Mi De-
 us: ne me in tantis doloribus deferito: ne
 D vsita/

vſitatam tuam erga me clementiam inter
 mittito. Tum vni ex illis brachium ipſius
 ſuſtinenti in autem inſuſurrauit, vt illi con-
 cionatori centum ſcutatos aureos adnume-
 raret, quos confeſtim Pariſienſis Eccleſiæ
 pauperibus erogaret. Aliquantò poſt Rex
 Nauarrus, Princeps Condeus cum inuiſe-
 runt, multisque illum verbis conſolati ſunt.
 Venerunt etiam ſub meridiem Mareſcalli
 Regni Danuillius, Coſſæus, & mox Villa-
 rius, cognomento Sabaudus, qui nunc A-
 miralli dignitatem obtinet. Hi quum a-
 mantiffimis verbis eum ſalutaſſent, nega-
 ſentque ſe eo veniſſe vt illum ad patientiam
 & fortitudinem animi cohortarentur: pro-
 pterea quòd, inquibant, tibi domi iſta na-
 ſcuntur, tu alios monere conſueuiſti: tibi
 ergo ipſi ne deſis: Hilari vultu ita respon-
 dit: Verè & ex animo vobis affirmo: haud-
 quaquam me mors terret. Lubenter ſpiri-
 tum quem à Deo fruendum accepi quum
 ipſe repoſcet, illi reddam. Sed magnopere
 optarem vt mihi beneficio Regisliceret ip-
 ſius Maieſtatem alloqui, nam habeo quæ
 illi dicā, quæ certò ſcio neminem veſtrum
 audere ad illum deferre. Reſpondit Danuila-
 lius ſe libenter id Regi renuntiaturum. Si-
 mulque ipſe & Villarius diſceſſerunt: ali-
 quanto diutius ibi Coſſæus reſtitit; cui A-
 miral/

mirallius : Meministiñ quid paucis ante
 horis tibi dixerim ? Sapiēs, & tibi cauebis.
 Aliquanto post nuntiatum est Regem adese
 se. Venere vna cum illo Regina mater, duo
 Regis fratres, Cardinalis Borbonius, Dux
 Mompenserius, Tauannius, Cossæus &
 Villarius Regni Marescalli : Comes Rhe-
 tius, Thoreus, Meruius, & Nanceyus.
 Rex his intromissis cæteros omnes exclu-
 di iussit præter Thelignium Amiralli ge-
 nerum, & vnum ex ijs qui hæc testantur
 cui imperauit, vt ad ianuam assisteret : vi-
 deretque ne quis præterea intrömittere-
 tur. Is vtriusque sermonem studiosissime
 attendit, & Deum testatur, ita se rem ha-
 bere, vt subscribamus. Quæ Regi in aurem
 admurmurari Amirallius, Deus nouit :
 Rex ipse quandiu viuet meminert. Quæ
 clara voce omnibus audientibus dixerit
 hæc fere sunt. Here, testis est mihi Deus, ad
 cuius tribunal euocatus iam videor, me
 quandiu vixi, fidelissimum erga Maiestas-
 tem tuam fuisse, imperioque tuo addictis-
 simum : semperq; ex animo ac toto pecto-
 re optasse, vt quam florentissimum ac bea-
 tissimum Regnum diutissime obtineres.
 Scio non defuisse, qui me proditorem &
 Regni tui perturbatorem appellarent. Sed
 confido Deum aliquando inter me & illos
 D ij disce

disceptatorem futurum, apud quem paratissimus sum illius meæ erga Maiestatem tuam fidei & obseruantię rationem reddere: si iam voluntas ipsius ferat, vt ex hac vita migrem. Porro quum à Rege Henrico parente vestro multis permagnis honoribus affectus fuerim, quos Maiestas tua mihi confirmare dignata est, non possum pro mea fide & studio non suppliciter abs te petere ne præclaram rei bene gerendæ facultatem tibi oblatam de manibus dimittas, præsertim quum res iam non sit integra, ac tam multa tui in Belgicum negotium animi documenta & quasi pignora quędam extent: vt si res inchoata relinquatur, maximum Regno tuo periculum impendat. Here, annon indignissimum est, ouum in tuo sanctiore consilio moueri non posse quin continuo antè ferè quàm conuersum sit, nuntius ad Albanum excurrat: annon indignissimum est, Ducem Albanum amplius trecentos vel nobiles, vel egregios milites, prælio Genlisiano captos, vel singulari, vel alio supplicij genere affici iussisse: quod tamen video hic in aula vestra pro ludibrio, ac planè pro iocandi ac ridendi materia haberi: Tertium, de quo cum tua Maiestate agere cupiebam, est Pacificatori vestri Edicti contemptus. Nam

Magi

Magistratus & Iurisdictioni vestræ præfecti adeo illud aspernantur, ac pro nihilo ducunt, vt fidem abs te datam & iuratam grauissimè violent : cuius fidei ac iurisdictioni etiam exterarum nationum Principes testes sunt. Hac de re frequenter ante hac cum Maiestate tua egi : monuiq; non aliam esse certiozem pacis, otij, tranquillitatisque publicæ tuendæ facultatem, quàm si Edicta vestra Pacificatoria seuerè obseruarentur. Qua de re tecum etiam, Regina mater, egisse me non ignoras. Sed ista vsque eo contemnuntur, vt etiam Trecenses ciues nuper in vxoris principis Condæi clientes impetum fecerint : quæ quum ex Edicti vestri formula villam nomine Insulam delegisset, in qua Religio nostra colebatur, nuper tamen vir quidam & nutritrix & infans in itinere interfecti sunt, quum ex concione illo in loco habita domum reverterentur. Huic Amiralli orationi Rex his respondit verbis: Mi Amiralli, habeo te, quemadmodum sæpe iam sum testatus, pro viro forti & fideli, & meæ dignitatis studiosissimo, denique vnum te iudico ex summis & fortissimis Regni mei Ducibus. Si aliam de te opinionem habuissem, nequaquam ea quæ iam ante feci, facere voluissem. Quantum ad Edictum meum

D iij

pacis

pacificatorium attinet, optavi semper, o
 proque etiam nunc, illud quam diligentis
 simè obseruari: ob eamque causam misi de
 lectos quosdam in singulas Regni mei pro
 uincias, qui negotium illud curent. Regi
 na mater mea huius mei mandati testis est.
 Tum Regina dixit, Ita est, mi Amiralli. Tu
 ipse scis vera ista esse. Verò: (respondit A
 mirallius) missi sunt delecti, sed ex eorum
 numero, qui me capitis & suspendij dam
 narunt: & pretium capiti meo quinquagin
 ta aureorum millia imposuerunt. Tum Rex,
 Alij ergo (inquit.) non suspecti mittendi
 erunt. Cæterum mi Amiralli, video te con
 tentius loqui. Ea contentio tibi & tuis vul
 neribus obesse posset. Tibi plaga est im
 posita, mihi dolor. Verum ego, Dei mor
 tem obtestans iuro, me hanc iniuriam ita
 seuerè vindicaturum, vt eius rei memoria
 nunquam ex animis hominum deleatur.
 Tum Amirallius. Here, inquit, non admo
 dum procul facinoris auctor inuestigan
 dus est. Ago tamen demississimis verbis,
 habeoque Maiestati vestræ gratiam, quòd
 se mihi ius reddituram pollicetur. Hospi
 ta (inquit Rex) & puer cursor comprehen
 si, & in carcerem abducti sunt, iudicesque à
 me constituti, qui diligentiam in inquiren
 do abhibeant. Vbi hæc dicta sunt, Rex
 glans

glandem qua percussus Amirallius fuerat, videre voluit, & eum qui ad ianuam stabat, sibi vt eam ostenderet in cubiculi angulum seduxit. Glans erat ærea. Tum ex eodem quæsiuit, primum, multũsne sanguis ex vulnere effluxisset: deinde an Amirallius graues dolores sensisset. Respondit alter quæ viderat, & memoria tenebat. Tum Rex hominis constantiam & magnitudinem animi admirari sese dixit, eidemque imperauit, ne ab illo discederet. Rex in cubiculo circiter vnā horā cum alijs superius nominatis commoratus est. Animaduersum est autem, Regem ad ea quæ Admirallius de Belgico negotio dixerat, nihil prorsus respondisse. Atque hæc quidem de sermonibus inter Regem & Amirallium habitis, de quibus speramus, nobis, & cum aduersario nostro conuenire. Nam in ista petulanti & contumeliosa oratione, tamen ingenuè fassus est, Regem illis comitatum Principibus, Amirallium inuississe, suam erga illum beneuolentiam testatum esse: rogassēq; vt se in arcem (quæ domicilium ipsius erat) deportari pateretur. Quid benignius, amantius, honorificentius à Rege proficisci potuit in Amirallium, quā eum ægrum inuifere, hospitioque humaniter inuitare? Videamus de-

inceps quæ perexiguo interiecto tempo-
 re acciderunt. Postero die Amirallius, eius-
 que amici certiores facti, Parisiensis, hoc
 est sexaginta infestissimorum Amiralli ho-
 stium millia, tumultuari & arma capere: pe-
 tierunt à Rege & ipsius fratre vt præsidium
 aliquot armatorum mitterent, qui ædes A-
 miralli tuerentur, vt siquid fortè plebs tur-
 baret, Regalis illius præsidij auctoritate co-
 erceri posset. Vterque prolixè liberalitèr-
 que respondit, negotiùmque Cossenio le-
 gionis Regiæ præfecto dedit, vt ascitis ali-
 quot suis manipularibus pro foribus Ami-
 rallij in statione ac præsidio maneret. Dicat
 nunc Criminator noster, primùm si consili-
 um necandi Regis Amirallius cepisset, an se
 in Cossenij fidem & potestatem commissu-
 rus fuisset? deinde si consilium occupan-
 dæ arcis Luparæ ibiq; necandi Regis Ami-
 rallius iniisset, an oblatum à rege hospiti-
 um recusaturus fuisset? an delatam sibi fa-
 cinoris admittendi facultatem repudiatu-
 rus? Si Guylij in Regis oculis interficiendi
 consilium ceperat, eamque ob causam, vt
 iste calumniatur, è lectulo virium experien-
 darum caussa surrexerat, cur tam idoneam
 oblatam rei gerendæ opportunitatem as-
 pernabatur? Iam verò siquid Amirallius pec-
 carat, siquid supplicio dignum admiserat,

nun-

nunquid satis tum captus & comprehensus videbatur: siue ipsius vulnera, & desperatam prope valetudinem spectemus, quæ illum in lectulo prostrauerat, siue præsidium à Rege impositum, & præfectum Cossenium? Vna tamen non intermissa nocte, signo campanis propè omnibus sub lucem dato, concursus armatorum fit & impetus in ædes Amiralli, duce (vt Aulici omnes fatentur) adolescente Guyssio: ante ambulatione Cossenio: qui primam in egiu aditu eadem facit: domesticisque Amiralli in vestibulo trucidatis, in ipsius cubiculum cum Benuessio aliisque sicarijs conscendit: eumque gladio in pectus adacto confodit. Tum occisi corpus è fenestra deiicit: furentique multitudini laniandum præbet. Ibi cadauer, primùm capite, tum deinde naribus, pudendis, auriculis, digitis mutilatum, per triduum (vt historia quoque Lugduni impressa testatur) vnco per lutulentas vrbs vias tractum, omnibus probris contumeliisque afficitur: ac tandem extra urbem vectum in patibulo recte ex pede vno suspenditur. Ecqui clamores Tragici, ecquæ Philoctetæ lamentationes tantæ crudelitati exponendæ pares esse poterunt? Quem Rex, Regina, duo fratres Regij, tot Principes, tot procures ac magnates pridie ho-

D v nore

nore tanto affecerant, vt ad eum ægrum & vulneratum adirent, amantissimis verbis consolarentur, fortissimum Ducem, iustissimum virum, fidelissimum ciuem appellarent, hic postridie cruentatus & laniatus de patibulo recte suspenditur. Vbi pietas Galliae? Vbi iustitia? Vbi fides publica? Vbi iurisiurandi Religio? Siquid Amiralus peccarat, annon satis captus utroque brachio, satis Cossenij praesidio comprehensus, satis Lutetiae urbis moenibus circumclusus erat? Cur igitur non reus iure gentium fiebat, non in iudicium adducebatur, non testibus conuincebatur, vt æquo iudicio damnatus, legitimo supplicio afficeretur? Iam verò vt Amirallium omittamus, quæ Turcia barbaria, quæ rabies, quæ belluina feritas illa est, plebem cruentato clarissimi viri corpore, crudelitate tamen illa non satiari, sed tanquam sanguine illo ebriam atque insanam per omnes urbis vicus plateasque bacchari, impetumque in singulas Religiosorum ædes facere? non viris, non mulieribus, non morbo, non ætate affectis non pueris, non denique infantibus parcere: cruentata corpora per fenestras abijcere: eadem luto cœnóque oblata in flumen eijcere: ædes amplius quadringentas, quasi vrbe impetu hostili capta, diripe

ripere: rapinis & latrocinijis omnia reple-
 re: idem aliquot consequentibus diebus pas-
 sim tota Gallia singulis propè in oppidis
 fieri: Quid est Conuiciator? Quid tu, hac de
 re interrogatus apud iustissimos & fortis-
 simos viros, Heluetiæ gentis magistratus,
 responderes? ecquem defensionis exitum
 reperires? Si triginta hominum millia ius-
 tè interfecta sunt, si centum familiarum ho-
 nestarum millia iustè oppressa sunt, quid tu
 causam aliquam non profers? si iniustè op-
 pressi sunt, cur non vindicantur? Cur ad-
 huc vna toto Galliæ regno quæstio decre-
 ta non est? Tu nobis fœdera, societates, a-
 micitias nescio quas polliceris. Quæ maio-
 ra vnquam in hominem vllum amicitia ac
 necessitudinis signa, testimonia, documen-
 ta, pignora deniq; extiterunt: quàm quæ
 nuper vniuersus Orbis in Regem Nauar-
 rum, Condæum, & Amirallium animaduer-
 tit? Tu fœderum mentionem facere audes?
 Per quem tandem deum fœdera ista socie-
 tatèsq; iurabuntur? per eumne quem tot per-
 iurijs violastis? quorum & procures Helue-
 tij & Principes Germani, omnes denique
 nationes exteræ testes fuerunt, quæ genti
 Gallicæ maculam sempiternam inusserunt:
 quæ seculorum omnium posteritas execra-
 bitur, Non est (ô sycophantæ & veterato-
 res

res conuicatoris istius similas) non est, in
 quam, in genere mortis & cruciatu carni-
 ficiū posita ignominia: in causa mortis,
 non in ipsa morte infamia est. Mors bonis
 viris ærumnarum est requies: beatæque &
 imortalis vitæ initium. Cruentatus est A-
 mirallius: cruentati etiam alij martyres
 Christi innumerabiles. Non sunt (vt qui-
 dam sapienter dixit) grauiora interdum car-
 nificum tormenta, quam cruciamenta mor-
 borum. Cruciatu fuerunt Prophetæ, crucia-
 tus Christus & cruci, ac patibulo suffixus.
 Qua morte nulla tum ignominiosior exco-
 gitari potuit: siquidem non in causa mor-
 tis, sed in ipsa morte contumelia inesset: sed
 verissimum vetus illud verbum est: Mors
 turpis forti viro accidere non potest, nec
 vel misera, vel immatura Dei misericordiæ
 confidenti. Pretiosa enim (vt scriptura
 loquitur) in conspectu Domini
 mors sanctorum eius,

FINIS.

